

## La stgiradetgna e sias qualitads

DA CARIN CADUFF

*Ins va oda casa cu igl ei stgir ed ins vegn a casa cu igl ei stgir.  
Il gi ei aunc lontans ni ch'el ei era schon vargaus.  
La clarezia sparrescha e la stgiradetgna dominescha.  
Mo la stgiradetga ha era sias varts interessantas.  
Tut ei auter e forsa era intec pli misterius la notg. Ils tuns semidan vegnan pli loms, pli migeivels.  
La glisch croda fin, creescha umbrivas & las umbrivas creeschan legns.  
Forsa essan schizun nus auters, cu la notg vegn sur la val.  
Ella enzuglia nus en siu vel nocturn, cuviera nos egl.  
Ina cuviarta sils egl – ina cuviarta che cuntegn ina nova brev.  
Ins laghegia, tschaghegna, suppona ed emprova da leger ella – la brev nocturna.  
Il bia retscheiv'ins ella cu ins ei vida scriver in'otra brev.  
Mo il punct ed il bustab grond ein amitg.*



FOTO C. CADUFF

## Bien gi, bien onn e biemaun!

■ Pli baul era ei da levar baul da Darniev – per ir da casa tier casa a giavischar als convischins in bien onn. Ussa durmin nus pli bugen ora e gudin ch'ins sto buca star si in gliendisgis a bun'ura ed ir ora el freid. Mintgaton ei gl'emprem gi digl onn niev era ideals per ir els cuolms culs skis ni cull'aissa duront che turists ed indigens dierman aunc. Quest onn han ins denton gia da stgir saviu ir siadora. La pendiculara Brambrüesch che meina da Cuera sin gest quei prau menziunau festivescha uonn 60 onns existenza. La pendiculara ha priu la caschun e purschü il survetsch gratuit

duront la sera da Silvester e la vesta giu sin Cuera e sillas muntognas grischunas ha buca trumpau ils hosps nocturns. Sisum han *Simri Buchli* e siu team cuntentau ils hosps ell'ustria pér aviarta dacuort sut il niev num VIVA berg.baiz.

Grazia alla glina plena e la nevada avon Nadal eran ils cuolms illuminai propi bein vesibels. Cunzun il Calanda ed il Scanvetg han ins viu bein, steilas denton strusch. Enstagl, grazia era a massa glischs d'advent, era il marcau da Cuera giubass. Aschia ch'enqualin ha priu la caschun da scursalar engiu. Auters, forsa gia memia stuorns, ein puspei sesi ellas

cabinas dalla pendiculara Brambrüesch viers il Welschdörfli nua ch'il VIVA club, mo era il local dalla Giuru, sesanfla. Igl empren onn ha mussau ch'ins savess aunc nezegiar meglier nossa localitad, eventual cun sentupadas regularas, semegliont sco gia introduciu a Turitg avon exact in onn cunzun entras studentas e students. A mintga present paga la Giuru l'emprema runda – quasi ina bunamana dad oz.

El num dalla Giuru giavischel jeu a tuts che han legiu tochen cheu ina bun'entschatta egl onn 2018. Bien onn!

Uolf Candrian



Vesta sur il marcau da Cuera situau amiez il contuorn muntagnard.

FOTO S. MANES

## Vuschs tematicas – antschever begin cumanzar


■ Entschaver n'è betg adina simpel. Tgi n'enconuscha betg il mument ch'ins na vegn betg inspirà? Nagina idea tge scriver. Ma cun leger in pled sa furma en il chau gia bler dapli davostiers che be quest pled? Per l'onn 2018 avain nus ponderà dad introducir in concept che duess inspirar ed animar giuvnas e giuvens da scriver contribuiziuns per las «vuschs giuvnas». La pagina resta dentant vinavant libra ad ulteriuras contribuiziuns en mintga rumantsch e vegn anc adina publicada mintga emprim venderdi dal mais. Las contribuiziuns èn adina dad inoltrar fin la fin dal mais, quai vul dir per regla fin ils 30. Il concept cumpiglia in pled per mais ed entschaiva oz cun questa emprima pagina. Ils plects èn ordinads tenor successiun alfabetica:

mais	pled tematic
schaner	antschever
favrer	barat
mars	cuorsa liunga
	u passlung
avrìgl	diluvì/dracca
matg	excess

zercladur  
fanadur  
avust  
settember  
october  
november  
december

far fain  
giuventüna  
heroxs  
ideal  
jacca  
kilometers  
legreivel

Concret vul quai dir ch'ins pudess scriver raquints, poesias u artitgels, disegnar u far caricaturas, crear ligns u cruscheras, fotografar u crear autras furmas da contribuiziuns per il proxim mais tar il chavazzin «barat». Temp per la tematica da l'auter mais avais vus fin ils 30 da schaner. Mintga contribuiziun tematica vala medemamain 50 francs paja sco tut tschellas contribuiziuns publicadas e tut ils extras muntan ulteriurs 25 francs latiers. Natiralmain n'èn quai naginas prescripziuns, mabain propostas che duessan inspirar e forsa po quai gidar da laschar nascher ideas che fan gust da svilupp vinavant. Nus ans legrain sa chapescha vinavant da mintga contribuiziun ch'ins po era trametter a giuru@giuru.ch ed engraziain gia cordialmain per la colavuraziun. Uolf Candrian e Flavia Hobi



FOTOS M. SUTTER

## Viver

■ Vais vus già üna vouta stüdgio che cha viver vuol dir? Que es ün pled cha minchün cugnouscha e tuots craian da savair che cha que es. Ma dschè üna vouta a qualchün ch'el dess explicher viver e vus badaregias svert, cha que nun es uschè simpel. Üngün viva listess scu l'oter e minchün ho sia eгна istorgia.

La vita es qualchosa complex. Nos cour batta daspö la terza eivna aint il vainter da nossa mamma. Ma es que già viver? U es que pür viver da quel mument d'avent cha nus ans essans consciaints da la vita? E che es il sen da la vi-

ta? Sün quista dumanda ho minchün ün'otra resposta. Mia resposta es, viver. Scha mia vita glivra vuless eau avair amihs dapertuot sül muond. Eau am vuless algorder da bels mumaints, e da trists. Eau vuless savair cha eau d'he fat qualchosa our da mia vita. Ed impustüt cha eau la d'he passanto cun gleud cha eau d'he gugent, e cha ho gugent a me.

Eir scha la vita es be ün stedi traunter la naschentscha e la mort es que l'unic stedi cha nus pudains influenzer.

Fè qualchosa our da vossa vita, cumanzè!

Michela Sutter

